

La Posta mida strategia

La Posta Svizra ha preschentà sia nova strategia «Posta da damaun» per ils onns 2021–2024

DA MARTIN CABALZAR/FMR

■ **La Posta Svizra vul stabilisar ses dumber da filialas, vul dentant crescer e sa sviluppar vinavant «a moda dinamica» cun l'intenziun da garantir en l'entira Svizra in service public da buna qualitat.** Quai han tant il parsura dal cussegl administrativ *Urs Schwaller* sco il schef operativ dal concern *Roberto Cirillo* punctua ier a la preschentaziun da la nova strategia per ils onns 2021–2024. Per pudair garantir er en l'avegnir in provediment da basa d'auta qualitat e pudair finanziair las investiziuns previdas da trais milliardas ord agens meds veglia La Posta crescer a moda planisada. Cun la nova strategia sviluppeschia La Posta vinavant sias cumpetenzas centralas tradiziunalas sco il transport da rauba, infurmazium e persunas sco era servetschs da finanza. Las investiziuns previdas duain vegnir generadas tras rinforzar ils servetschs da logistica e da comunicaziun.

Stabilisar la rait da postas

La Posta Svizra trasferescha sias filialas deficitaras en in'atgna societad d'acziun. Questa nova «Rait da Posta SA» duai anc cumpigliar 800 filialas. La fin da mars da quest onn aveva La Posta anc 962 filialas, pia ina reducziun da radund in tschintgavel. «Cun la nova strategia renunzia La Posta ad in tagl radical da las filialas», ha accentuà Schwaller. Era cun las novas

structuras quinta La Posta cun in deficit da radund 100 milliuns tar las filialas. Quai saja dentant tuttavia supportabel, ha ditg Schwaller. L'onn passà han las filialas chaschunà in deficit da 132 milliuns.

Las filialas ed il spurtegl restian vinavant las pitgas centralas da La Posta. Ils servetschs da La Posta restian uschia accessibels en l'entira Svizra, la rait postala vegnia anzi rinforzada. Da nov porscha La Posta er ad ulteriurs partenaris la pussaivladad da s'integrar en las localitads da posta. Tras questa decisiun veglian ins era facilitar il contact fisic da La Posta cun sia clientella e nizzegiar meglier il spazi disponibil. Vi dal deficit na vegnia quai dentant betg a sa midar bler.

Logistica e digitalisaziun

En l'avegnir duajan ils secturs da pachets e brevs vegnir reunids en ina domena d'interpresa. La crisa da corona haja anc



Il dumber da las filialas da La Posta duai vegnir stabilisà sin la cifra da radund 800.

PTT/CC BY-SA 2.0

intensivà marcantamain la tendenza creschenta dal volumen tar la spediun da pachets. «Ils Svizzers vulan vegnir servids immediat, da tut temp, dapertut ed a moda cumpurtaivla cun l'ambient – il pli gugent gist avant l'agen isch chasa», ha ditg Cirillo. La Posta sa stentia perquai er da sviluppar novs products cun dar speziala atenziun a «l'ultima miglia». Tar il transport da rauba vul La Posta segirar sia posiziun dominante en la logistica ed er tschertgar pussaivladads da cooperaziun en ils pajais vischins.

Segirar ils posts da lavur en las regiuns

Cun optimar l'adiever da las infrastrukturas sajan ils posts da lavur segirads en tuttas regiuns, punctuescha La Posta. En vista ad ina gronda unda da pensiunaments en il decurs dals proxims onns sa stentia La Posta da render anc pli attractivas las professiuns da posta. Era sch'i dettia tschertas adattaziuns tar spediun e repartiziun vegnian ils posts da lavur e la surfatscha da produziun mantegnids. Encuntercomi posisian tscherts pensums e tschertas func-

ziuns entaifer il cader sa midar. La transformaziun progressiva dal concern sut il titel da la «Posta da damaun» pretendia ulteriuras capacitads e cumpetenzas e n'effectueschia betg ina reducziun dals posts da lavur. Sco usità tar La Posta sajan midadas organisatoricas adina er accumpagnadas dals partenaris socials. La Posta considerescha sasezza sco «motor d'ina Svizra moderna», ha ditg il manader dal concern Roberto Cirillo.

Tar la comunicaziun digitala vul La Posta nizzegiar ses trumf che garantescha il «secret da brevs». La spediun fisica da brevs duai vegnir remplazzada dal transport digital cun garantir la confidenzialitad necessaria. Sin il sector digital vul La Posta extender ses servetschs cunzunt a favur da la sanitad publica e da la corrispondenza uffiziala. L'intenziun saja dentant era da gidar interpresas pitschnas e mesaunas tar la transmissiun digitala.

Postfinance duai pudair dar credits

Las ulteriuras spartas dal concern èn pertugadas mo a l'ur da la nova strategia. Reglà da nov suenter la purificaziun da 2018 vegn PostAuto che resta ina

part impurtanta da l'interpresa e duai mantegnair sia rolla dominante en il transport regional da persunas cun sviluppar soluziuns da mobilitad pli persistentas.

La figlia Postfinance haja sco suletta banca en Svizra in'incumbensa da segirar il provediment da basa tar ils pajaments. En l'avegnir duai ella er pudair conceder credits e hipotecas. Tenor Schwaller e Cirillo ston Cussegl federal e Parlament uss sclerir questa dumonda. Sco banca relevanta per il sistem stoppia Postfinance er ademplir las prescripziuns d'avair agen capital. Post Solutions vegn a sa sviluppar vinavant sin plaun internaziunal, ha confermà Cirillo.